

玉樞寶經

水 讚

先天真水 淨洗靈台 楊枝一滴洒塵埃
凡境即蓬萊 滌穢消災 香林法界開

太上皈命禮蕩魔解穢大天尊（三稱）

香 讚

爐煙起篆 道氣騰祥 誠心一炷噴天香
繚繞透穹蒼 周遍十方 諸神現金光

太上皈命禮香雲浮蓋大天尊（三稱）

淨心神咒

太上台星 應變無停 驅邪縛魅 保命護身
智慧明淨 心神安寧 三魂永久 魄無喪傾

淨口神咒

丹朱口神 吐穢除氛 舌神正倫 通命養神
羅千齒神 卻邪衛真 喉神虎賁 氣神引津
心神丹元 令我通真 思神鍊液 道炁長存

淨身神咒

靈寶天尊 安慰身形 弟子魂魄 五臟玄冥
青龍白虎 隊仗紛紜 朱雀玄武 侍衛我身

安土地神咒

元始安鎮 普告萬靈 嶽瀆真官 土地祇靈
左社右稷 不得妄驚 回向正道 內外澄清
各安方位 備守宮庭 太上有命 搜捕邪精
護法神王 保衛誦經 皈依大道 元亨利貞

淨天地神咒

天地自然 穢氣分散 洞中玄虛 晃朗太元
八方威神 使我自然 靈寶符命 普告九天
乾羅答那 洞罡太玄 斬妖縛邪 殺鬼萬千
中山神咒 元始玉文 持誦一遍 卻鬼延年
按行五嶽 八海知聞 魔王束手 侍衛我軒

凶穢消散 道炁長存

祝香神咒

道由心學 心假香傳 香爇玉爐 心存帝前
真靈下盼 仙旆臨軒 令生關告 逕達九天

金光神咒

天地玄宗 萬炁本根 廣修萬劫 證帝神通
三界內外 惟道獨尊 體有金光 覆映帝身
視之不見 聽之不聞 包羅天地 養育群生
誦持萬遍 身有光明 三界侍衛 五帝伺迎
萬神朝禮 役使雷霆 鬼妖喪膽 精怪亡形

內有霹靂 雷神隱名 洞慧交徹 五炁騰騰
金光速現 覆護真人 急急如
玉皇光降律令敕

開經讚

神霄雷祖帝 九天普化君
談道鈇九鳳 持法騎麒麟
統攝聖嶽將 掌令判雷霆
三辛逢初六 察人善惡情
消災并度厄 稱名誦寶經

太上皈命禮九天普化大天尊（三稱）

九天應元雷聲普化天尊玉樞寶經

爾時

九天應元雷聲普化天尊。在玉清天中。與十方諸天帝君。會於玉虛九光之殿。鬱蕭彌羅之館。紫極曲密之房。閱太幽碧瑤之笈。考洞微明晨之書。交頭接耳。細議重玄。諸多陪臣。左右蹴踏。

天尊宴座。朗誦洞章。諸天帝君。長吟步虛。彩女仙姝。散花旋繞。復相引領。遊戲翠宮。群仙導前。先節後鉞。龍旂鸞輅。

飄飄太空。並集於玉梵七寶層台。時有雷師皓翁。於仙眾中。越班而出。面

天尊前頰顙作禮。勃變長跪。上白

天尊言。天尊大慈。天尊大聖。為群生父。

為萬靈師。今者諸天。咸此良覲。適見

天尊。閱寶笈。考瓊書。於中祕蹟。不可縷計。惟有玉霄一府。所統三十六天。內院中司。東西華臺。玄館妙閣。四府六院。及諸有司。各分曹局。所以總司五雷。天臨三界者也。

天尊至皇。心親庶政。此等小兆。以何因緣。得以趨服。願告欲聞。

天尊言。雷師皓翁。爾等仙卿。儲勳夙世。累行昨生。故得玉府登庸。瓊宮簡錄。今慈勳行。視夙昨多。爾其悉力雷司。委心火部。日復日。歲復歲。勳崇行著。性霽神融。克證高真。即階妙道。惟是雷部鬼神。晝勞夕役。動有捶楚。大則考黜。屑雲雕雪。無有已時。檄龍命鴉。此息彼作。彼所因故。爾其耳焉。雷師皓翁及諸天

諸仙。聳耳而默。

天尊所坐九鳳丹霞之扆。手舉金光明之如意。
。琅風清微。綺雲郁麗。

天尊寂然良久。天尊言。吾昔於千五百劫以
先。心縫此道。遂位上真。意釀此功。遂
權大化。嘗於大羅

元始天尊前。以清淨心。發廣大願。願於未
來世。一切眾生。天龍鬼神。一稱吾名。
悉使超煥。如所否者。吾當以身身之。爾
等洗心。為爾宣說。

天尊言。爾諸天人。欲聞至道。至道深竊。
不在其他。爾既欲聞。無聞者是。無聞有
見。即是真道。聞見亦泯。惟爾而已。爾
尚非有。何況於道。不聞而聞。何道可談
天尊言。道者。以誠而入。以默而守。以柔
而用。用誠似愚。用默似訥。用柔似拙。
夫。如是。則可與忘形。可與忘我。可與
忘忘。入道者知止。守道者知謹。用道者
知微。能知微。則慧光生。能知謹。則聖
智全。能知止。則泰定安。泰定安。則聖

智全。聖智全。則慧光生。慧光生。則與道為一。是名真忘。惟其忘。而不忘。忘無可忘。無可忘者。即是至道。道在天地。天地不知。有情無情。惟一無二。

天尊言。吾今於世。何以利生。為諸天人。演此妙寶。得悟之者。俾躋仙阼。學道之士。信有氣數。夫。風土不同。則稟受自異。故謂之氣。智愚不同。則清濁自異。故謂之數。數繫乎命。氣繫乎天。氣數所囿。天命所梏。不得真道。愚可以智。濁可以清。惟命俾之。愚昏昏。濁冥冥。亦風土稟受之移之。天地神其機。使人不知。則曰自然。使知其不知。則亦曰自然。自然之妙。雖妙於知。而所以妙。則自乎不知。然於道。則未始有以愚之濁之。諸天聞已。四眾咸悅。

天尊言。吾今所說。即是玉樞寶經。若未來世。有諸眾生。得聞吾名。但冥心默想。作是念言。

九天應元雷聲普化天尊。或一聲。或五七聲

。或千百聲。吾即化形十方。運心三界。使稱名者。咸得如意。十方三界。諸天諸地。日月星辰。山河草木。飛走蠢動。若有知。若無知。天龍鬼神。聞諸眾生。一稱吾名。如有不順者。馘首剗心。化為微塵。

天尊言。吾是九天貞明大聖。每月初六及旬中辛日。監觀萬天。浮遊三界。若或有人。欲學道。欲希仙。欲追九玄。欲釋三災。當命正一道士。或自同親友。於樓觀。

於家庭。於里社。酌水饋花。課誦此經。或一遍。三五遍。乃至數十百遍。即得神清氣爽。心廣體胖。凡有希求。悉應其感。天尊言。身中九靈。何不召之。一日天生。二日無英。三日玄珠。四日正中。五日子丹。六日回回。七日丹元。八日太淵。九日靈童。召之則吉。身中三精。何不呼之。一日胎光。二日爽靈。三日幽精。呼之則慶。五心煩懣。六脈搶攘。四肢失寧。百節告急。宜誦此經。

天尊言。若或有人。五行奇蹇。九曜嶽崎。年逢刑衝。運值剋戰。孤辰寡宿。羊刃劍鋒。劫煞亡神。鬼門鉤絞。祿遭破敗。馬落空亡。動用凶危。行藏坎壈。即誦此經。上請。天官解天厄。地官解地厄。水官解水厄。五帝解五方厄。四聖解四時厄。南辰解本命厄。北斗解一切厄。

天尊言。沉疴伏枕。痼疾壓身。積時弗瘳。求醫罔效。五神無主。四大不收。或是五帝三官之前。泰山五道之前。日月星辰之前。山林草木之前。靈壇古蹟之前。城隍社廟之前。里巷井竈之前。寺觀塔樓之前。或地府三十六獄。冥官七十二司。有諸冤枉。致此牽纏。或盟詛咒誓之所招。或債塚負債之所致。三世結讐。累劫興仇。埒其咎尤。庫其執對。皆當首謝。即誦此經。

天尊言。天官符。地官符。年月日時。各有官符。方隅向背。各有官符。大則官符。小則口舌。是有赤口白舌之神。以主之。

凡諸動作與舉。出入起居。不知避忌。如遇官符。口舌。則使人擊聒。曉夜煎縵。多招唇吻。面是背非。動致口牙。盟神詛佛。始於謗讟。終於詬詆。由是獄訟生焉。刑憲存焉。若欲脫之。即誦此經。遂得口舌潛消。官符永息。

天尊言。土皇九壘。其司千二百神。土侯土伯。土公土母。土子土孫。土家眷屬。若太歲。若將軍。若鶴神。若太白。若九良。若劍鋒。若雌雄。若金神。若火血。若身黃。若撞命。若三煞。若七煞。若黃旛豹尾。若飛廉刀砧。如是等。土家神煞。若人修卜筮。一或犯之。即致病患。以迄喪亡。纔誦此經。則萬神皆起。天無忌。地無忌。陰陽無忌。百無禁忌。天尊言。世人夫婦。其於婚合。或犯咸池。或犯天狗。三刑六害。隔角交加。孤陰寡陽。天羅地網。艱於嗣息。多是孤獨。若欲求男。即誦此經。當有九天監生大神。招神攝風。遂生賢子。於其生產之時。太

乙在門。司命在庭。或有冤愆。或有鬼魅。或有禁忌。或有凶厄。致令難產。請誦此經。即得九天衛房聖母。默與抱送。故能臨盆有慶。坐草無虞。凡有嬰孩。在於襁褓。為旃檀神王座下。一十五種鬼。加諸惱害。因多驚癇。宜誦此經。

天尊言。若人居止。鳥鼠送妖。蛇蟲嫁孽。拋磚擲瓦。驚雞弄狗。邀求祭祀。以致影脅夢逼。及於姦盜。而敢據其所居。以為巢穴。遂使生人被惑。庭戶不清。夜嘯於梁。晝瞰其室。牛馬犬豕。亦遭瘟疫。禍連骨肉。災及孽生。窳祠妖社。黨庇神姦。弔客頻仍。喪車疊出。若誦此經。即使鬼精滅爽。人物咸寧。

天尊言。九天雷公將軍。五方雷公將軍。八方雲雷將軍。五方蠻雷使者。雷部總兵使者。莫賺判官。發號施令。疾如風火。有廟可伐。有壇可擊。有祟可除。有妖可遣。季世末法。多諸巫覡。邪法流行。陰肆魘禱。是故上清。乃有天延禁鬼錄。奸之庭

帝。猷束妖考邪之房。能誦此經。其應如響。

天尊言。天瘟地瘟。二十五瘟。天蠱地蠱。二十四蠱。天瘵地瘵。三十六瘵。能通此經。即使瘟癘清淨。蠱毒消除。勞瘵平復。亦有其由。或者先忘復連。或者伏屍故氣。或者塚訟墓注。或者死魂染惹。或者屍氣感招。凡招鬼神。或悲思。或恚恨。牽連執證。並緣注射。乘隙伺間。乃得其便。故此經者。上通三天。下徹九泉。可

以追薦魂爽。超度祖玄。太上遺素車白馬大將軍。以監之。

天尊言。若或有人。治裝遠行。賊盜逞姦。五兵加害。陸行。則虎狼魍魎磨其牙。水行。則蛟龍鼉鼉張其頤。或灘瀨有幽枉之魂。或風濤有劫數之會。前亡後化。捉生代死。能於此經。皈命投誠。故得水陸平安。行藏協吉。

天尊言。亢陽為虐。雨澤愆期。稽顙此經。應時甘澍。積陰為癘。雨水浸窰。稽顙此

經。應時朗霽。祝融扇禍。飛火民居。赤鼠游城。驚爇黎庶。此經可以禳之。海若失經。魚鱉妄行。洪水稽天。民生墊溺。此經可以止之。

天尊言。世人欲免。三災九橫之厄。即於靜夜。稽首北辰。北辰之上。上有三台。其星並躔。形如雙目。疊為三級。以覆斗魁。是名天階。若人見之。生前無刑囚之憂。身後無淪沒之苦。斗中復有尊帝二星。大如車輪。若人見之。留形住世。長生神

仙。歸命此經。投星北極。即有冥感。斗為天樞。中有天罡。在內則為廉貞。在外則為破軍。雷城十二門並隨天罡之所指。罡星指丑。其身在未。所指者吉。所在者凶。餘位皆然。若人見之。壽可千歲。

天尊言。世衰道微。人無德行。不忠君王。不孝父母。不敬師長。不友兄弟。不誠夫婦。不義朋友。不畏天地。不懼神明。不禮三光。不重五穀。身三口四。大秤小斗。殺生害命。人百己千。姦私邪淫。妖誣

叛逆。從微至著。三官鼓筆。太乙移文。即付五雷。斬勘之司。先斬其神。後勘其形。斬神誅魂。使之顛倒。人所鄙賤。人所嫌害。人所怨惡。以致勘形震屍。使之崩裂。驅其捲水。役其驅車。月覈旬校。復有考掠。一聞此經。其罪即滅。若或有人。為雷所噴。其屍不舉。水火不受。即稱。

九天應元雷聲普化天尊。作是念言。萬神稽首。咸聽吾命。

天尊言。此經功德。不可思議。往昔劫中。神霄玉清真王。長生大帝。所曾宣說。至士授經。皆當剗金置幣。盟天以傳。雷師皓翁。長跪拜興。重白。

天尊言。是經在處。當令土地。司命。隨所守護。雷部按臨。以時稽審。若人家有此經。至誠安奉。即得祥煙滿庭。慶雲磨軒。禍亂不萌。吉福來萃。於其亡歿。不經地獄。所以者何。死即往生。生歸善道。承天尊力。有此靈通。出入起居。佩帶此經。

。眾人所欽。鬼神所畏。遇諸險難。一心稱名。

九天應元雷聲普化天尊。悉得解脫。於是雷師誥翁。對天尊而說偈曰

無上玉清王。統天三十六。九天普化君。化形十方界。披髮騎麒麟。赤腳躡層冰。手把九天炁。嘯風鞭雷庭。能以智慧力。攝伏諸魔精。濟度長夜魂。利益於眾生。如彼銀河水。千眼千月輪。誓於未來世。永颺天尊教。

時雷師皓翁。說是偈已。

天尊言。此經傳世。世人未知。吾今所治。九天應元府。府有九天。雷門吏者。以糾綠典者。廉訪典者。佐之。復有四司。一曰掠剩司。二曰積逮司。三曰幽枉司。四曰報應司。各有大夫。以掌其事。吾之所理。卿師使相。咸贊元化。

天尊說是經畢。玉梵七寶層台。天花繽紛。瓊香繚繞。十方諸天帝君。咸稱善哉。天龍鬼神。雷部官眾。三界萬靈。皆大歡喜。

。信受奉行。

九天應元雷聲普化天尊玉樞寶經竟

雷祖寶誥 志心皈命禮

九天應元府。無上玉清王。化形而滿十方。
。談道而趺九鳳。三十六天之上。閱寶笈。
。考瓊書。千五百劫之先。位上真。權大
化。手舉金光如意。宣說玉樞寶經。不順
化作微塵。發號疾如風火。以清淨心。而
弘大願。以智慧力。而伏諸魔。總司五雷
。運心三界。群生父。萬靈師。

大聖大慈。至皇至道。

九天應元雷聲普化天尊（三稱）

收經讚

玉樞寶經 萬德洪名 經文全卷最宏深

字字演真銓 句句消愆 集福消災障

太上皈命禮九天普化大天尊（三稱）

吉祥讚

願晝吉祥夜吉祥。晝夜六時恆吉祥。
二六時中吉祥者。列聖錫福降吉祥。